

MIŠLJENJE

**Po zahtjevu Advokatskog društva Marić & Co Sarajevo o obavezi podnošenja
prijave koncentracije**

**Sarajevo
septembar, 2015. godine**

Broj: 01-26-7-14-3-I/14
Sarajevo, 10.09. 2015. godine

Na osnovu člana 25. stav (1) tačka f) Zakona o konkurenciji ("Službeni glasnik BiH" 48/05, 76/07 i 80/09), a po Zahtjevu Advokatskog društva Marić & Co Sarajevo, Mehmeda Spahe 26, Sarajevo, zaprimljenog od strane Konkurencijskog vijeća dana 18.08.2015. godine, pod brojem 01-26-7-14-I/15, Konkurencijsko vijeće, na 108. (stotinuosmoj) sjednici održanoj dana 10.09. 2015. godine, je donijelo

MIŠLJENJE

Marić & Co, advokatsko društvo sa ograničenom odgovornošću, Mehmeda Spahe 26, 71000 Sarajevo (u daljem tekstu: Podnosilac zahtjeva), podnijelo je Konkurencijskom vijeću Bosne i Hercegovine (u daljem tekstu: Konkurencijsko vijeće) Zahtjev za mišljenje (u daljem tekstu: Zahtjev) dana 18.08.2015. godine zaprimljen pod brojem: 01-26-7-14-I/15.

Podnosilac zahtjeva traži mišljenje o postojanju obaveze podnošenja prijave koncentracije, u smislu Zakona o konkurenciji (u daljem tekstu: Zakon), te u bitnom navodi sljedeće:

- da je pravno lice A iz Republike Srbije osnivač i 100% vlasnik pravnog lica B iz Republike Srbije, te da planira izvršiti prenos 76% udjela u kapitalu društva B na pravno lice C iz Bosne i Hercegovine (zaključivanjem ugovora o prenosu udjela). Nakon izvršenog prenosa udjela pravno lice A bi imalo udio od 24% u pravnom licu B, dok bi pravno lice C imalo udio od 76% u pravnom licu B.
- odluke iz nadležnosti skupštine društva B nakon prenosa udjela donosile bi se običnom većinom, izuzev sljedećih odluka koje bi se donosile jednoglasno:
 - izmjene osnivačkog akta
 - povećanje i smanjenje osnovnog kapitala društva, kao i svaka emisija hartija od vrijednosti
 - raspodjela dobiti preko 50% iznosa dobiti za prethodnu poslovnu godinu (do 50% iznosa dobiti za prethodnu poslovnu godinu skupština donosi običnom većinom), i načinu pokrića gubitaka, uključujući i određivanje dana sticanja prava na učešće u dobiti i dana isplate učešća u dobiti članovima društva
 - imenovanje i razrješenje direktora i utvrđivanje naknade za njihov rad, odnosno načela za utvrđivanje te naknade
 - odobravanje ugovora za pristupanje novog člana i davanje saglasnosti na prenos udjela trećem licu, iz čl.167. Zakona o privrednim društvima, osim u slučaju prenosa udjela na člana u sklopu poslovne grupe, postojećih vlasnika, kada je potrebna obična većina

- pravno lice A povezano je sa još dva društva koja su registrovana u Republici Srbiji (u daljem tekstu: Grupa A), dok je pravno lice C povezano sa više (12) društava koja su registrovana u više različitih zemalja (u daljem tekstu: Grupa C).
- Grupa C je u 2014. godini na svjetskom nivou ostvarila ukupni konsolidovani godišnji prihod od 466.358.097 KM, dok je ukupni godišnji konsolidovani prihod na teritoriji Bosne i Hercegovine u 2014. godini iznosio 109.512.881 KM.
- drugi učesnik koncentracije Grupa A je u 2014. godini na svjetskom nivou ostvarila ukupni konsolidovani prihod od 13.196.363 KM, dok je na teritoriji Bosne i Hercegovine u istoj godini ostvarila ukupni godišnji prihod od 253.644 KM.
- da ciljno društvo svoju djelatnost obavlja na teritoriji Republike Srbije te da je zajednički tržišni udio učesnika koncentracije na teritoriji Bosne i Hercegovine daleko niži od 40%.

S tim u vezi, Konkurencijsko vijeće navodi da je članom 12. stav (1) Zakona, propisano šta se smatra koncentracijom i to:

- a) spajanje ili pripajanje nezavisnih privrednih subjekata ili dijelova privrednih subjekata.
- b) sticanje kontrole ili dominantnog uticaja jednog, odnosno više privrednih subjekata nad drugim, odnosno nad više drugih privrednih subjekata ili dijelom drugog privrednog subjekta, odnosno dijelovima drugih privrednih subjekata, i to:
 1. sticanjem kupovinom većine dionica ili udjela osnovnog kapitala; ili
 2. sticanje većine prava glasa; ili
 3. na drugi način, u skladu sa odredbama zakona koji regulišu osnivanje privrednih subjekata i njihovo upravljanje;
- c) zajedničko ulaganje na dugoročnoj osnovi, dva ili više nezavisnih privrednih subjekata, koji djeluju kao nezavisan privredni subjekt.

- članom 12. stav (2) Zakona, propisano je se da sticanje kontrole ostvaruje putem prava, zaključivanjem sporazuma ili drugim sredstvima kojim jedan ili više privrednih subjekata, bilo posebno, bilo zajednički, uzimajući u obzir sve pravne i činjenične okolnosti, stiču mogućnost ostvarivanja dominantnog uticaja nad jednim ili više privrednih subjekata;

Članom 14. stav (1) Zakona, propisano je da su učesnici namjeravanu koncentraciju obavezni prijaviti kada su ispunjeni slijedeći uslovi:

- a) da ukupni godišnji prihod svih učesnika koncentracije ostvaren prodajom roba i/ili usluga na svjetskom tržištu iznosi 100.000.000,00 KM po završnom računu u godini koja je prethodila koncentraciji; i
- b) da ukupni godišnji prihod svakog od najmanje dva privredna subjekta učesnika koncentracije ostvaren prodajom roba i/ili usluga na tržištu Bosne i Hercegovine

iznosi najmanje 8.000.000,00 KM po završnom računu u godini koja je prethodila koncentraciji, ili ako je njihov zajednički tržišni udio veći od 40,0%.

Članom 2. Odluke o načinu podnošenja prijave i kriterija za ocjenu koncentracija privrednih subjekata („Službeni glasnik BiH“, broj 34/10) propisano je da su namjeravanu koncentraciju iz člana 12. Zakona, učesnici koncentracije obavezni prijaviti i to:

- a) privredni subjekti sa sjedištem i prebivalištem u inostranstvu ukoliko su ispunjeni uslovi iz člana 14. stav (1) tačke a) i b) Zakona, i
- b) privredni subjekti sa sjedištem i prebivalištem u Bosni i Hercegovini ukoliko su ispunjeni uslovi iz člana 14. stav (1) tačka b) Zakona.

S obzirom na navode Podnosioca dostavljene u Zahtjevu, Konkurencijsko vijeće smatra da nisu kumulativno ispunjeni uslovi iz člana 14. stav 1. tačka a) i b) Zakona, pa shodno tome Podnosioci ne bi bili obavezni prijaviti koncentraciju.

Ovo mišljenje je dato isključivo na osnovu navoda iz Zahtjeva.

**Predsjednica
Maida Čampara**

Dostavljeno:

- Marić & Co, advokatsko društvo sa ograničenom odgovornošću, Mehmeda Spahe 26, 71000

Sarajevo

- a/a